

Satesfecho den Sekura

Ladronisia, materialismo, weganan di plaka, èts. ta pesta nos komunidad. Pakiko? Talbes un persona lo respondé, "Plaka ta rais di maldat! Beibel mes ta afirmá asina!"

Esei ta bèrdat? Si bo ta kere e dicho ei, anto e mihó kos ku bo por hasi ta pa rondia tur bo sèn (lamta e delaster depchi for di bo kuantanan di banko, saka tur plaka for di bo pòtmòn i fo'i bou di kolchon) anto kambia e sèn na biyèt i pega tur na kandela. Ora shinishi so a sobra, anto bo por selebrá pasobra porfin bo a deshasi di e temibel "rais di maldat."

Talbes bo ta protestá ku akshon asina ta muchu drastiko, irresponsabel, i drispidimentu. Sikiera por duna e plaka na hende ku ménos rekursu. Generosidat ta algu bon, ma si ta bèrdat ku "plaka ta rais di maldat," anto bo ta regalá e hende pober un maldishon ora bo ta dun'é sèn.

En realidat, loke algun hende ta konvensé ta un dicho bíbliko, ta un kibokashon. Palabra di Dios NO ta bisa ku PLAKA ta rais di maldat. Den nos mundu awendia, nos tur tin mester di plaka pa biba. Difísilmente bo por kome sin plaka. I kua persona ku su sano huisio lo ta dispuesto pa kima tur su sèn?

Loke Beibel SI ta bisa ta "Rais di tur malu ta amor pa plaka" (1 Timoteo 6:10). AMOR pa plaka, no plaka, ta rais di tur malu. Esei ta algu kompletamente diferente. Set pa sèn i kos material ta poderá mentalidat di hopi hende!

Kuantu kos bo mester tin pa bo ta kontentu? Evaluá bo mes onestamente. Bo ta satesfecho ku e poseshonnan ku bo tin, òf bo semper mester tin mas? Kisas bo outo di 1991 ta den bon kondishon, pero segun bo konsepto bo MESTER tin un kos di kareda mas nobo i mas luhoso. Bo MESTER tin sierto paña pa lusi ku n'é. Maske tin kèts muchu mas barata, bo MESTER tin Nike, òf un otro marka renombrá. I no lubidá e kadenanan i renchinan pa duna un impreshon mas apropiá! Bientu natural no ta sirbi mas; mester tin fèn di plafòn den kada kamber òf èrko pa freska e palasio ku bo ta yama bo kas. Bo tin mester di mas kos pa bo ta kontentu, òf bo por ta satesfecho ku loke bo tin?

Un hende a puntra un mionario kuantu sèn e mester tin pa e ta kontentu. El a respondé, "Un florin mas!" Hopi hende tin e mésun mentalidat. Semper un florin so falta pa nan ta kontentu. Ora nan ta hañé, ainda un heldu mas ta nesesario pa nan ta satesfasé.

Dentro di algun dia, nos gobernantenan ta bai tuma algun medida drastiko pa kubri nan debenan astronómiko. E abundansia ku nos tabata gosa lo ser afektá. Plaka lo bira mas skars. Nos lo mester hala faha mara un tiki mas duru. Algun asta por haña nan den pèrtá.

Kon lo bo reakhoná? Sigur ningun di nos lo kima sèn bou di e impreshon kiboká ku plaka ta rais di maldat! Ma hopi hende, debí na nos amor pa plaka, lo reakhoná na un forma negativo ora nos ta nota ku e kantidat di biyèt bou di kolchon ta mengua! Lo bo pèrmití bo montante di moneda determiná bo alegria?

Palabra di Dios ta bisa, "Si nos tin pa kome i pa bisti, lo nos keda kontentu ku esei" (1 Timoteo 6:8). Kuantu kos bo mester tin pa bo ta kontentu? Segun e teksto aki, si bo tin kuminda i paña bo por ta satesfecho! Ripará bon ku Dios NO ta bisa ku bo mester tin siertu marka di paña òf kuminda di snèk pa bo ta kontentu. Kuantu kos adishonal di bèrdat ta NESESARIO den bida? Fuera di kuminda, paña, i (nos lo agregá) un dak riba nos kabes, tur otro kos ta èkstra!

Nos tin ku realisá ku alegria i satesfakshon ta un desishon konsiente ku bo ta hasi. Bo por SKOHE pa ta kontentu APESAR DI SIRKUNSTANSIANAN maluku! Un aktitut di gratitut pa e poseshonnan ku Dios a dunábo ta un kalidat ku bo por desaroyá. Bo por SIÑA ta kontentu ku e poko ku bo tin!

Apòstel Pablo a skirbi, "Mi a siña di konformámi ku loke mi tin. Mi sabi di biba umiyá, i mi sabi tambe di biba den abundansia...tantu ta ku barika yen komo di pasa hamber, méskos di ta den abundansia komo di pasa nesesidat. Tur kos mi por den Kristu ku ta dunámi fortaleza" (Filipensenan 4:11-13). Si bo aseptá Kristu den bo bida, asta lo bo por keda satesfecho den sekura!